

鐵
琴
銅
劍
樓
藏
書
目
錄

鐵琴銅劍樓藏書目錄卷第九

常熟瞿 鏞子雍

史部二

編年類

漢紀三十卷

影鈔
宋本

首行題曰漢紀目錄越數格曰荀氏以後低一格列
漢帝目次接自序一篇畢即接本書首標高祖第一
越二格曰漢紀又越數格曰荀氏末有右通直郎時
添差充紹興府會稽縣丞莊革校正一行每半葉十
三行行廿四字當是從紹興間錢唐刻本影寫者案

此書祥符天聖中皆有刊本昔人每謂不若紹興本之善明黃姬水亦得宋本以刊相較則此本爲勝如高祖紀武臣自號爲武信君黃刻誤君爲軍今卒少惰矣誤率爲年別將梅錯功多封萬戶候誤萬爲舊漢卽挑戰慎勿與戰勿令得東而已脫下勿字吾乃今日知爲皇帝之貴拜通爲奉常誤奉爲泰皆足訂

正舊爲崑山葉氏藏書

卷首有葉氏棗竹堂藏書圖朱記

元經薛氏傳十卷

明刊本

此書舊稱隋王通撰唐薛收傳宋阮逸注晁氏讀書志陳氏書錄皆謂其卽出阮逸依託桐城姚氏謂文

獻通考載有十五卷今止十卷自魏太和以後數十年不書一事已非阮氏僞本全書矣此本失去序跋當刻自成弘間舊爲葉文莊公所藏

卷首有葉氏葉竹堂藏書朱記

通曆十五卷

影鈔宋本

晁氏讀書志云通曆十卷唐馬總撰續通曆十卷荆南孫光憲撰宋太祖以孫書所紀非實詔毀其書故直齋書目中興館閣書目玉海皆十五卷孫書僅存五卷已經後人刪併矣此本雖有十五卷之數而一卷至三卷文皆不類首題史臣李燾著顯出僞託故三國首蜀而來亦無論略其四卷至十卷起西晉迄

隋有總案語論著允當與玉海所云合則爲馬氏原本無疑十一至十五卷多載黃巢李茂貞劉守光阿保機吳越兩蜀事迹且及符瑞夢兆神怪等說與讀書志所云合則孫氏所續之本也書中殷敬字皆減筆蓋猶依宋刻殘本所鈔

資治通鑑二百九十四卷

宋刊本

此書原闕廿五卷又十九葉鈔補全卷一至卷八題朝散大夫右諫議大夫權御史中丞充理檢使上護軍賜紫金魚袋臣司馬光奉敕編集其卷九以下題銜較多曰翰林學士朝散大夫右諫議大夫知制誥

兼侍講同提舉萬壽觀公事兼判集賢院上護軍河
內郡開國侯食邑一千三百戶賜紫金魚袋臣司馬
光奉敕編集第四行低三格題某朝紀小字注曰起
某某盡某某几幾年用太歲名第五行低五格題某
王帝第六行本文目錄系卷後目後有元豐七年十
一月溫公進書表結銜與前題名異曰端明殿學士
兼翰林侍讀學士太中大夫提舉西京嵩山崇福宮
上柱國河內郡開國公食邑二千六百戶食實封壹
仟戶蓋前所題者英宗時結銜也同修者劉攽劉恕
范祖禹檢閱文字者司馬康俱署銜表後有獎諭詔

書又元豐八年九月十七日准尚書省劄子奉聖旨
重行校定元祐元年十月四日奉聖旨下杭州鏤板
校對者爲張耒晁補之宋匪躬盛次仲校定者爲張
舜民孔武仲黃庭堅劉安世司馬康范祖禹主校者
爲呂大防李清臣呂公著俱署銜以左爲上又紹興
二年七月初一日兩浙東路提舉茶鹽司公使庫下
紹興府餘姚縣刊板紹興三年十二月二十日畢工
印造進入列主管本司文字兼造帳官及提舉茶鹽
司邊知白常任佚強公徹石公憲韓協王然六人銜
校勘監視者列嵎縣進士婁諤茹贊廷唐奕婁時升

婁時敏石表茹升王念張綱等興國縣主簿唐自餘
姚縣進士葉汝土杜邦彥錢移哲陸寔顧大治呂克
勤張彥衡朱國輔杜紱孫彬等又餘姚主簿王綱嵎
縣尉薛鑑嵎縣丞桂祐之紹興府學教授晏肅餘姚
縣丞馮榮叔晏敦臨知嵎縣范仲將知餘姚縣徐端
禮鎮東節度判官張九成諸人此本似卽紹興時所
刻然書中慎敦郭字皆闕筆疑出寧宗時修板印行
也每半葉十一行行廿一字板刻清朗楮墨如新允
爲宋刻致佳本舊藏郡中汪氏

卷中有敬德堂圖書
印桂堂王氏季積圖

籍趙子印
氏諸朱記

資治通鑑三卷

宋刊
殘本

存魏紀六七兩卷唐紀二十六卷每卷首無題銜
字紀年下注干支二小字間附音義於本文每半葉
十一行行十九字案胡景參釋文辨誤附載海陵本
費本各條核此本音義知卽爲蜀廣都費氏進修堂
板刻世所謂龍爪本是也音義與史本微有不同魏
紀中闕字史作苦濫切此作苦浪願字史作渠希切
此作渠斤史爲不誤曹爽挾彈到後園中注彈徒案
切挾弓以行園史本園作也字則似此本爲優

資治通鑑七十七卷

宋刊
殘本

存卷四至二十四卷六十七至八十七卷一百五十九至一百八十五卷二百三十五至二百五十七卷每半葉十一行行二十一字貞桓字減筆舊藏邑中

錢氏

有錢後人文石
朱象元氏朱記

資治通鑑二百九十四卷

元刊本

題朝散大夫右諫議大夫權御史中丞充理檢使上護軍賜紫金魚袋臣司馬光奉敕編集後學天台胡三省音注此元時興文署刻本案至元二十七年正月立興文署召集良工刊刻諸經子史板本以通鑑爲起端是官刻善本也後有溫公進書表元豐七年

獎諭詔書元祐元年奉旨下杭州鏤板校定諸人銜
名紹興二年兩浙東路提舉茶鹽司公使庫下紹興
府餘姚縣刊板校勘監視諸人銜名前有胡三省音
注自序舊藏郡中文氏邑中嚴氏皆有題識文氏曰
丁亥年九月玉磬山房闕又曰萬曆丁酉歲十二月
廿又三日看畢老人心力衰減涉獵而已彊記則不
能也清涼居士記又曰家中書籍散亡此書幸存老
年無事時一觀覽遂至再四然心神耗減不能記憶
障目而已萬曆辛丑四月朔日湘南老人記時年七
十有三又曰此書向在亨弟所天啟丙寅閏六月偶

念祖父手澤思欲一觀因以師古齋所刻一部易之
藏於石經堂三世藏書家不多有遺書能讀乃足貴
耳二十五日乙丑震孟謹記又嚴氏曰此本爲文氏
藏書自衡山先生至文肅公俱有題識病中無聊命
筆點一過賦性魯鈍掩卷卽忘殊可恨也丙辰十月
十六日嚴虞惇記又曰此爲文氏藏書先大人得之
以授小子者也先世藏書一無所存惟此猶爲故物
故自里門攜至京師時一展玩但應酬牽牽不能專
力大概涉獵而已虞惇記時戊寅八月二十日又曰
虞惇年十三先君子白雲先生卽命讀資治通鑑因

用徐氏坊本點閱一過後復校此書歷年動筆圈點
作輟不恆去歲謫官索居無事遂得終閱嚴虞惇再
記時辛巳二月十八日又曰先君子於此書凡經六
七閱歲久紙畫零落不堪展讀雍正庚戌命工重裝
補綴成帙庶可傳之家塾此書自文氏衡山先生歷
文肅公凡口世先王父中憲公爲文肅外孫故幼時
卽受而卒業繼以授先君子逮予小子亦經三世歷
年二百有餘前賢之遺蹟未渝先人之手澤宛在子
孫其永保之哉婆謹志

卷末有玉蘭堂圖書記石經
堂印世綸堂印嚴虞惇讀書

朱記

呂大著點校標抹增節備註資治通鑑七十三卷

宋刊
殘本

此宋麻沙本原書一百二十卷今闕卷一至八卷十
四至十六卷三十至三十八卷四十五至五十三卷
九十一至九十四卷一百七至一百二十九四十七
卷其前十二卷爲通鑑君臣事要總記皆分類摘事
以便行文摭拾亦當時習科舉之書也每半葉十五
行行二十六字匡殷慎桓字減筆諸家書目不載惟
見千頃堂書目

資治通鑑釋文三十卷

影鈔
宋本

題右宣義郎監成都糧料院史炤撰案宋時史炤有

二人一眉山人字見可咸淳中官利路統制見度宗紀卽作釋文者一潁昌人嘉祐中提舉常平乃文彥博嘗從受學者也馮時行序此書謂其精索而粗用深探而約見積十年成書自胡景參作辨誤而史書遂徵近代諸家題著錄者乾隆間吳中藏書家始購得宋刻本潛研錢氏謂景參長於地理見可精於小學二書不可偏廢至謂史本范雎之雎作千餘切而胡改音雖李芑之芑作蒲紅切而胡改居包翻使雎雎莫別芑芑互淆直以不狂爲狂是又代見可作辨誤以還相報復矣

通鑑釋文辨誤十二卷

元刊本

元胡三省撰專辨史氏釋文地理之誤凡已見音注者不載自序極辨海陵本公休注之爲僞託謂其蹈襲史釋至以烏桓爲烏元宋諱欽宗名桓公休以溫公薨而毀卒不得豫爲欽宗諱然公休本刻於海陵郡齋已在靖康後諱桓爲元或刻時改之未可遽以致疑司馬伋編通鑑前例自序有欲與音釋竝行一語伋卽公休之孫不當有誤迺謂伋未傳家學而爲妄人所誤亦出臆斷况直齋書目明載公休釋文二十卷又謂史因公休舊注而附益之伯玉與見可其

時相距不遠當非無據若謂序中未嘗言及祖述公
休此序出他人手非若自序之不當諱言也

資治通鑑考異三十卷

明刊本

題端明殿學士兼翰林侍讀學士太中大夫提舉西
京嵩山崇福宮上柱國河內郡開國公食邑二千六
百戶食實封一千戶臣司馬光奉勅編集前有提督
浙江學校按察副使河汾孔天允題記謂嘉靖甲辰
六月開局校刻資治通鑑明歲春三月完其書另考
異三十卷俱從唐太史家木板文字

卷首有嘉禾
施衮朱記

通鑑釋例一卷

舊鈔本

宋司馬光撰此書南渡後遺藁脫落先後無序溫公曾孫伋掇取分類爲三十六例中有文全而字闕者仍闕之今本字無闕文增刻與范祖禹論修書帖二通此猶原本也有乾道丙戌司馬伋後跋

通鑑外紀詳節十卷

宋刊本

題祕書丞劉恕編集前有通鑑御製序溫公進書表獎諭詔書司馬伋通鑑前例後序後有恕自序每半葉十四行行廿五字殷讓貞樹恆桓完慎字闕筆卷數尚仍原書惟目錄五卷年經事緯上列朔閏天象下列卷數者皆不載其餘亦多刪節以出宋人手筆

故購藏之

卷首有橫經閣收藏圖籍印末有華亭朱氏朱文石史諸朱記

中興小紀四十卷

鈔本

宋熊克撰排次南渡以後事蹟始建炎丁未終紹興壬午宋史藝文志作四十卷陳氏書錄解題作四十一卷是書前列四庫提要云原書篇第爲編纂者所合併舊目已不可尋今約略年月依宋史所載原數仍勒爲四十卷蓋從四庫本傳錄者也

歷代紀年十卷

宋刊本

宋晁公邁撰案陳氏書錄云公邁字伯咎詠之子嘗官提舉司者所紀歷代年號首正統自唐虞迄北

宋爲七卷次封建國號一卷次僭據附藩鎮一卷次盜賊外夷及見道家書者又總錄年號以終焉末附國朝典禮數葉載宋祖至淵聖樂舞宮殿名及郊會拜陵幸學大赦德音若而次終以祖宗神御在京者原注云元稿附見逐朝冊葉畧行外今存卷末其正統每帝紀年下并載皇后帝子在朝職官若而人後李季永十朝綱要卽仿其例也其紀年號夏諒祚有廣禎清平二號與玉海合可補宋史之闕天顯屬遼太宗不屬太祖遼道宗有壽昌無壽隆與東都事略玉海通考等合可訂遼史之譌是書刊於紹熙壬子

後有淳熙乙未晁子綺記及包履常跋書錄外惟見

錢遵王讀書記此卽述古堂藏本當時首卷已亡無

從鈔補矣

卷首有平江黃氏藏書朱記

續資治通鑑長編一百八卷

影鈔宋本

宋李燾撰案文簡此書累次編成隆興元年先編十七卷奏上乾道四年成一百八卷自太祖建隆元年始至英宗治平四年止迨淳熙元年編成九百八十八卷又爲舉要六十八卷總目五卷遂爲完書此則乾道奏進之本前有表文一篇宋時有刻本依之傳錄每半葉十三行行廿三字海寧吳氏藏本中有校字

槎客筆也

卷首有竹垞藏本
兔牀經眼朱記

續宋編年資治通鑑十八卷

元刊本

題朝散郎尚書禮部員外郎兼國史院編修官李燾
經進前列進通鑑長編表一篇目後有武夷主奉劉
深源校定一行蓋元時刻書人也案文簡惟不敢續
通鑑故曰續通鑑長編此書紀太祖至欽宗事蹟皆
疎略其出後人僞撰可知

資治通鑑綱目五十九卷

宋刊本

宋朱子撰不題名前列治平四年御製通鑑序獎諭
詔書司馬溫公進書表與范夢得論修書帖通鑑目

錄序舉要補遺序朱子自作序例目錄後有武夷詹
光祖重刊於月崖書堂一行卷一與卷五十九後俱
有建安宋慈惠父校勘一行張月霄氏謂惠父卽編
提刑洗冤集錄者爲淳祐間人遂定爲淳祐刊本是
書卽月霄所藏也每半葉十行行十六字目用雙行
行廿二字匡恒貞偵朗桓完構慎字皆闕筆字畫清
朗楮印如新與所藏資治通鑑本相似可謂雙璧矣
卷首有御史之章季振宜印滄葦
乾學徐健庵天官冢宰諸朱記

資治通鑑綱目五十九卷

元刊本

是本板印精好不減宋刻惜原序已失舊爲楊五川

萬卷樓藏書

卷首有楊夢羽氏朱記

大事記十二卷通釋三卷解題十二卷

舊鈔本

宋呂祖謙撰案成公自序謂作於淳熙七年又二年
卽歿故序云起春秋迄五代卒未成書僅至漢武帝
征和三年而止成公長於史學朱子最稱此書謂其
精密門人不敢贊一辭故無人續成之至明王氏禕
始有續編行世然未能屢讀者之意也

綱目分注發微十卷

鈔本

題從政郎安吉州安定書院山長劉國器撰自序謂
溫公書因舊史以紀事使觀者自擇其善惡得失以

爲勸戒朱子則言必證其事事必驗其實理雖莫要於綱而尤詳於目故大書以提要分注以備言刊落浮辭約歸至理因以己意闡明其故洵足推見朱子作書之微旨矣諸家書目俱不載惟見文淵閣書目此由叢書堂本傳錄

資治通鑑綱目集覽五十九卷

元刊本

元王幼學撰案幼學字行卿望江人學宗程朱至元間躬耕慈河之坂與學者講道不輟人稱慈湖先生自序謂編始於大德己亥迄延祐戊午積二十年七易稿而成後來陳濟有集覽正誤瞿佑有集覽鐫誤

糾正頗多弘治間莆田黃治中取其書與尹氏發明
劉氏書法徐氏考證陳氏正誤馮氏質實汪氏考異
散入綱目各條下而是書遂無專刻矣此猶初刻原
本有朱子原序幼學自序序後有墨圖記八分書二
行云歲在上章敦牂孟夏魏氏仁實書堂新刊

編年通載四卷

影宋殘本

題起居舍人直集賢院同知審官西院事兼判史館
臣章衡上進前有元祐三年建安章彙序衡進書表
原書始帝堯迄宋治平丁未今存者止於吳太康庚
子明內閣藏書目錄載二冊云第五卷以下皆闕是

明時已不全矣案晁陳兩家書目及焦氏經籍志俱載有十五卷惟通志略則云十卷此本原序亦云十卷是十五卷之說未可信也

皇宋十朝綱要二十五卷

舊鈔本

宋眉山李塹編案塹字季永文簡公熹次子紹熙元年進士理宗朝歷官同知樞密使四川宣撫使文簡五子壁與塹尤以文學知名蜀人以比三蘇壁有雁河集荆公詩注塹僅傳此書紀太祖至高宗朝事蹟每一帝必首紀年號及皇后皇子公主若而人宰相參知政事樞密使副使使相三司使學士舍人院御

史中丞及每年取進士若而人復紀外改廢置州府等而以誕節神御殿終焉以下案年月逐條紀錄凡朝政大事畢載雖采摭從略亦有出於文簡所撰長編之外者可資攷證諸家書目匙有著錄屢見玉海文淵閣書目焦氏經籍志中陳平甫皇朝編年備要引用書目亦列之惟敘銜爲左史與璽官秩不合豈文簡子屋嘗領實錄事故采纂成編後彙本流傳屋璽字形相近遂誤以爲璽作耶

皇朝編年備要二十五卷補刊編年備要五卷

影鈔宋本

題壺山陳均撰紀太祖至欽宗事平甫爲丞相正獻

公從孫侍從之下獲睹國史及先儒諸書博攷互訂
輯香成編皇朝或作九朝陳氏書錄亦作皇朝并列
舉要三十卷或疑舉要已佚案伯玉云舉要爲綱備
要爲目似當時分爲二書各編三十卷今綱目並列
出後人合并此本每卷標題編年下空二格實卽舉
要二字可證其未亡也況真文忠序稱書名曰舉要
備要是非二書明矣伯玉譏其去取無法詳略失中
國朝小長蘆叟則謂其簡而有要勝於陳子經薛
方山之書潛研錢氏謂書成南渡之世故老舊聞未
盡散失有可補正史之闕者至其書雖依朱子綱目

大書分注之例而以宋人紀宋事但據事直書不爲
褒貶之詞自序中亦及之錢氏議其唐主景北漢主
鈞同爲敵國而鈞書卒景書死同一高麗王而徽與
運書卒容與俱書死爲義例乖刺竊意平甫未嘗寓
褒貶於一字偶爾紀載參差不足爲病也此本鈔手
甚舊宋諱字多闕筆每半葉八行分注用小字雙行
每行大字十六小字廿三當爲明時印寫宋本

中興兩朝編年綱目十八卷

影鈔
宋本

是書不著撰人名氏亦無序跋紀南宋高孝兩朝事
始建炎元年終淳熙十七年大書分注體例與陳平

甫編年備要同平甫又有中興編年舉要備要十四卷或卽其書後人更其名耳向來藏書家俱未著錄唯見文淵閣書目

續編兩朝綱目備要十六卷

影鈔宋本

亦不著撰人名氏紀光宗寧宗兩朝事體例與中興兩朝編年同故曰續編書中均字注御名當出理宗時人所作疑亦平甫之書平甫於端平初始得官也諸家書目皆未著錄世所傳者出自永樂大典此猶原本也以上三種款式相同迺宋時合刻本明人影寫者嚮藏邑中張氏

卷首有愛日精廬藏書朱記

續宋中興編年資治通鑑十五卷

元刊本

題通直郎戶部架閣國史實錄院檢討兼編修官劉
時舉撰卷首題宋時職名而書中有元太祖爲成吉思
思皇帝一語是人元後所作矣始高宗建炎元年迄
寧宗嘉定十七年敘述有體要秀水朱氏謂其條理
勝王宗沐薛應旂之書上方有提要及中所錄議論
低一字別之者乃刊書人附入非劉氏原書也目錄
後有陳氏餘慶堂刊一行舊爲吳方山藏書

記

卷首有
吳岫朱

宋季三朝政要六卷

元刊本

不著撰人名氏卷首題云理宗國史載之過北無復
可考今將理度兩朝聖政及幼主本末纂集成書以
備他日史館之採擇云蓋宋之遺民所作多載宋末
軼事可補正史之闕目錄後有墨圖記云至治癸亥

張氏新刊舊爲邑中吳氏藏書

卷首有吳卓信
印項儒二朱記

宋史全文續資治通鑑三十六卷附宋季朝事實二卷元刊本

不著撰人姓氏卷首題豐城游明大昇校正無序跋
首冠以乾道四年李燾進續資治通鑑長編表一篇
又宋朝玉裔宋朝傳授二圖目錄前有刊書人題識

一則云宋史通鑑一書見刊行者節略太甚讀者不無遺恨焉本堂今得善本乃名公所編者前宋已盛行於世今再綉諸梓與天下士大夫共之云云似三十六卷爲元人重刻宋本其實靖康以前卽取諸李燾長編高孝二代取諸留政中興聖政草及無名氏中興兩朝編年綱目光寧二代取諸劉時舉續宋中興編年資治通鑑惟後載度宗少帝益王廣王事蹟別名宋季朝事實者則爲元人專輯書肆題語謂前宋已盛行者似不足信至宋牧仲謂卽胡宏續通鑑長編一書亦未知其何據也

卷首有墨香閣圖書朱記

通鑑續編二十四卷

元刊本

元陳桎撰前有張紳姜漸序又陳氏自序謂余讀歷代史輯事之大者爲筆記百卷乃取盤古至高辛爲通鑑世編一卷唐天復至周亡遼夏初事爲通鑑外編一卷宋有國至元爲通鑑新編廿二卷總之爲廿四卷合名曰通鑑續編其於宋自建隆至太平興國四年但書甲子其四年平北漢後方繫正統以比漢唐遼金繫年宋統之下以比吳魏卽本朱子語錄大書分注例曰續通鑑實續綱目也明成化間詔商輅等續修綱目雖有刪訂實卽襲用之

紀事本末類

通鑑紀事本末四十二卷

宋刊本

題建安袁樞編是書初刻於淳熙乙未爲嚴陵小字本編二百九十卷此大字本迺汴趙節齋與憲重併卷第刻於寶祐五年後延祐六年節齋之孫明安眞之嘉禾學宮遞有修板此猶元時印本也每半葉十
一行行十九字板心有字數及梓人姓名書中遇宋諱字皆減筆前有淳熙元年楊萬里序寶祐丁巳趙與憲序延祐六年陳良弼序

三朝北盟會編二百五十卷

舊鈔本

題朝散大夫充荆湖北路安撫司參議官賜緋魚袋
臣徐夢莘編集并序凡紀宋金通和用兵之事始政
和七年迄紹興三十一年所引書目多至二百餘種
可謂搜采無遺矣世無刊本傳鈔者率多謬譌脫落
惟泰興季氏藏本尚爲舊帙友人邵君恩多據以校
過有跋曰北盟會編世無刊本惟季滄葦家鈔藏本
每葉有何子宣騎縫圖記者最爲近古向藏蘇氏今
爲張君子謙所有向其借得屬余參校凡譌謬脫略
悉爲訂正可稱完善

袁氏通鑑紀事本末撮要八卷

影鈔
宋本

題建安袁樞機仲編建安蔡文子行之撮其書卽取
袁氏標題而略舉其事之大要每題下注明起某帝
幾年盡某帝幾年末又注以上詳見某帝紀雖曰撮
要與袁書體例稍異可各自單行也諸家書目俱不
載此從郡中汪氏所藏宋本影寫每半葉十四行行
二十三字宋諱匡朗貞徵桓恒構字皆減筆

蜀鑑十卷

舊鈔本

不題撰人據李文子序知爲文子屬資中郭允蹈輯
世亦稱文子作也此影寫宋本爲吳方山藏書較明
初蜀本爲勝如光武建武元年延岑屯杜陵與赤眉

逢安戰大破之蜀本與誤興漢中王嘉亦與赤眉將
廖湛戰於谷口大破之蜀本脫口字南陽今鄧州蜀
本鄧誤登峽州長楊縣有古扞關城尚存蜀本脫尚
字此類不可勝舉蜀本有淳祐五年古鄧別某跋一
篇此本無之舊爲吳方山藏書末有方山跋云鋪序
整飭記載詳到雖其文句不能如華陽志之秀拔瞻
美而每值郡邑地土必爲標注使考蜀事者不至混
漫此則有特長焉

卷首有吳岫及
方山二朱記

別史類

汲冢周書十卷

元刊本

晉孔晁注此書在宋時有李文簡陳正卿藏本東徐
丁黼校刻於嘉定十五年有李燾跋及黼序元至正
甲午四明黃玠復序而刻之卽此本也其程寤秦陰
九政九開劉法文開保開八繁箕子耆德月令十一
篇已亡中有闕文闕字蓋宋時已斷爛不全矣

卷首有吳

元恭氏及吳興
沈淪二朱記

宋太宗實錄八卷

鈔本

宋錢若水柴成務宋度吳淑楊億同撰見晁氏讀書
志陳氏書錄解題原書八十卷今存卷第二十六至
三十卷七十六卷七十九至八十共八卷億本傳云

寶錄凡八十篇億獨草五十六卷則此本多其筆也
卷末有書寫人及初對覆對姓名宋諱皆闕筆郡中
黃氏得南宋時館閣鈔本此從之傳錄

九國志十二卷

鈔本

宋路振撰振字子發永州祁陽人淳化中登甲科真
宗時知制誥嘗采五代時吳南唐吳越前後蜀東南
漢閩楚九國君臣行事作世家列傳未成而卒王厚
齋云書凡四十九卷陳氏書錄云末二卷爲北楚書
高季興事張唐英所補撰合五十一卷文獻通考宋
藝文志俱作五十一卷不言補輯姓氏原書已失傳

此出曲阜孔氏舊鈔殘帙僅存列傳百三十六篇其
世家之文俱佚矣

隆平集二十卷

明刊本

題南豐曾鞏集晁氏讀書志疑其書出依託非南豐
所撰然趙伯衡序謂其爲左史日撰集以進且云曾
大父昔典宗正嘗授此書又似無可疑者序作於紹
興十二年其曾大父當亦元祐間人也今通行本多
謬誤此江西曾氏刻本差勝序後有墨圖記云董氏
萬卷堂本卷中多朱筆校正譌字末有題記一行云
乾隆五十年夏四月二十五日兩窗校訖箸溪老人

記

玉牒初草二卷

鈔本

題蒲陽劉克莊錄宋寧宗嘉定十一十二兩年實錄也

古史六十卷

宋刊本

宋蘇轍撰并序又後跋案文定此書草創於元豐中至元祐九年以少府監分司南京暇輒爲之明年三月書成季子遜承命爲之注卷首不題名氏小題在上大題在下書中桓字減筆蓋南宋時所刻每半葉十一行行廿二字舊藏邑中李氏

卷首有李莊仲圖書記及海虞朝棟

莊仲寶
藏朱記

通志二百卷

元刊本

題右迪功郎鄭樵撰并序元三山郡庠刻本每半葉
九行行二十一字至治初郡守吳繹嘗捐俸募印數
十部散之江北諸郡序後有至治二年九月印造一
條并列當時福州路銜名七行

路史四十七卷

明刊本

宋廬陵羅泌纂其子萃承命作注是書舊本久湮在
明時有錢唐本多舛譌豫章本差善而僅梓前後紀
其國名發揮餘論等未刻萬曆間廣陵喬可傳參校

重刻世始有完本可讀有乾道庚寅泌自序乾道丙申費輝序張鼎思刻前紀後紀序喬可傳重刻序

契丹國志二十七卷

元刊本

宋葉隆禮撰前有經進契丹國志表末題淳熙七年三月日祕書丞葉隆禮上表又契丹國初興本末契丹世系圖契丹國九主年譜契丹地理圖晉獻契丹全燕之圖卷末有黃堯圃二跋其一云契丹國志余向藏鈔本其上方有小字標明書中眼目以爲必有所據及觀顧氏元刻本方信鈔本所自出果元本也昨歲春間鮑淥飲以元刻見歸尾卷多缺急向顧氏

借錄孰知顧本自十五卷以下皆缺乎遂就其見存之卷校補缺字而還之丁卯正月十九日復翁其一云辛未仲夏書友以契丹國志鈔本求售識是述古堂物與元刻款式同因請西賓陸東蘿鈔補余書之缺亦一快事也小暑後一日復翁識

大金國志四十卷

影鈔
元本

首列宋端平元年正月十五日淮西歸正人改授承事郎工部架閣臣宇文懋昭上表目錄後有金國九主年譜又金國世系之圖其表與圖蘇州刻本俱遺又此本眉間有提要語與元刻契丹國志相同乃從

元本鈔出故與 閣本亦有字句不同處未有漁洋

山人跋

蜀漢本末三卷

元刊本

題趙居信集錄居信號東溪信都人此書作於至元
戊子首列漢帝世次始高帝終帝禪又世系圖亦然
意以蜀繼漢爲正統紀事之體亦依綱目而敘述較
詳每條後附諸儒胡氏真氏尹氏蕭氏之論末自爲
總論一篇美昭烈復漢之功而以史臣進曹魏抑昭
烈爲厚誣曲諱論後又有自跋至正己丑嗣子某守
建寧出其書示建安書院山長黃君復刻之君復有

跋卷末有建安詹璟刊一行元刻致佳本也

古今歷代十八史略三卷

元刊本

題廬陵曾先之編紀三皇至宋事爲上下兩卷首以
歷代國號歌世年歌甲子紀年及國都地名爲一卷
於史事粗具梗概元時鄉塾課本也舊爲錢遵王藏

書見讀書敏求記

卷首有述古堂圖書
記興祖孝修諸朱記

元祕史十五卷

鈔本

不著撰人名氏是編用蒙古語紀錄所聞旁加翻譯
每段下又爲分解其詞甚俚而敘太祖太宗事最得
其實可補元史之闕諸家書目皆不載惟見文淵閣

書曰此出嘉定錢氏藏本自永樂大典錄出間又有元刻本作十卷續集二卷

雜史類

國語二十一卷補音三卷

明刊本

題韋氏解有序補音則宋庠以唐人舊本補輯書中注明補音者乃宋氏增也明人刻國語散附各條下多脫誤此正德刊本尚仍宋本之舊惟校讐未善間有謬字如魯語踦跋注云賈本作跋布我反注云跋蹇也誤作蹄蹇也舊爲賴古堂藏本

卷首有德園周氏藏書朱記

鮑氏國策十卷

宋刊本

題縉雲鮑彪校注前有紹興十七年彪自序次以曾
鞏舊序劉向進書序劉序後有記云彪校此書四易
槩而後繕寫云云卷末又有記云庚午晦重校脫誤
猶數十處此書手所撰次書也而若此是以知校正
之難也後有刻板跋云國策舊有高誘注甚略吾鄉
先生鮑公彪守習孤學老而益堅取班馬二史及諸
家書比輯而爲之注條其篇目辯其譌謬缺則補衍
則削乖次者悉是正之時出己意論說四易彙始成
其用功亦厯矣而世罕傳余得其本刊之會稽郡齋
使學者知前輩讀書不苟如此公妙年甲進士第恥

求人知嘗有此身甘作老文林之句其志操可見白
首始爲郎卽挂冠歸田里杜門著書有書解及杜詩
注行於世紹興辛亥日南至括蒼王信書每半葉十
一行行二十字注字同書中慎字有減筆孝宗後刻
本非紹興原刻也明嘉靖龔雷刻本行款相同無王
信跋而有李文叔正覺書後二篇惟展卷一二葉卽
有譌字韓策嚴遂陽堅也堅譌豎留之十四日十譌
中客之辭辭譌辯其全書迷謬可知已

鮑氏戰國策注十卷

明刊本

題縉雲鮑彪校注有序此嘉靖翻宋本終卷後有附

記一條云庚午

原闕二字

晦重校脫誤猶數十處此書手

所撰次書也而若此是以知校正之難也知當時宋本得鮑氏手槧而刻者是本卷末有篆書云嘉靖戊子後學吳門龔雷校下有明威二字墨記舊爲太倉

陸氏藏本

卷首有潤之所藏朱記

戰國策校注十卷

元刊本

題縉雲鮑彪校注東陽吳師道重校此書合高誘注姚宏續注校正鮑注闕失每條注明正曰補曰別之仍不改鮑注原本面目爲從來注國策之最善本今世通行有明初刻本曲阜孔氏本此則至正二十五

年平江路所刊迺吳氏成書後第一刻本也剞劂精良校讐無譌乃元刻之僅見者第三四五六卷末有至正乙巳前藍山書院山長劉鏞重校勘一行第八九十卷末有平江路儒學正徐昭文校勘一行有彪自序師道自序及陳祖仁序其卷首牒文及劉向曾鞏序李文叔王覺孫元忠書後姚寬耿延禧序已闕

貞觀政要十卷

明刊本

題唐衛尉少卿兼修國史修文館學士吳兢撰陳氏書錄云新舊書列傳兢未嘗爲此官而書亦不記歲月案舊唐書兢傳實載此官惟不載是書耳元合魯

合刺解嘗爲之解以進見危太樸合魯武惠公家傳
今亦不傳是本注文爲至順間臨川戈直伯敬所作
又采唐宋諸儒說附之名曰集論刊於成化元年有
兢自序吳澄題辭郭思貞題辭戈直序及明憲宗御
製序

奉天錄四卷

舊鈔本

唐趙元一撰并序專紀朱泚作亂事始建中四年迄
興元元年藏書家題著錄惟見崇文總目陳氏書錄
及通志

五代史闕文一卷

舊鈔本

題宋翰林學士王禹偁撰進有自序書凡十七篇謂薛史所闕也歐史多采用之此本爲孫潛夫鈔卷末

題記云辛酉夏六月借黃俞邵鈔本一勘卷中有孫潛之印

夫二
朱記

五代史補五卷舊鈔本

題潯陽陶岳介立撰有自序岳爲雍熙二年進士晁氏讀書志陳氏書錄俱作五代補錄共一百七事此則一百四事蓋有關遺矣卷末有野竹齋藏本五字題記云己亥歲仲夏下浣傅俞氏假唐月心本重錄一過又云嘉靖十五年歲次丙申季秋下浣柳僉重

錄又朱筆題云崇禎辛未仲春六日以海虞馮已蒼
鈔本對閱于寒山小宛堂則趙靈均筆也

卷首有沈與文印沈

辨之印姑餘
山人諸朱記

靖康紀聞一卷

舊鈔本

題武陵孤臣丁特起編集前有自序謂靖康元年在
京師爲西樞門下客頗得其事繼趨函關與同舍郎
講問尤詳悉懼天下後世或失其傳因列日以書之
起元年十一月至明年五月九日目擊親聞罔敢違
誤蓋實錄也

建炎復辟記一卷

舊鈔本

不著撰人陳氏書錄亦曰無名氏全書俱紀苗劉之亂而載韓蘄王兵事特詳殆蘄王麾下賓客所紀首

有平江陳氏西酌
艸堂藏本諸朱記

松漠紀聞二卷

明刊本

宋洪皓撰紹興丙子伯子适刊於歙有跋乾道九年仲子遵守建鄴又刻之并撰補遺十一事於後皆得之傍侍親聞者亦有跋此明嘉靖間郡中顧氏重雕本卷末有長洲顧氏家藏木板校行一條

卷首有孫潛及潛夫

二朱記

大金弔伐錄二卷

舊鈔本

不著撰人名氏紀金太祖太宗與宋用兵事詳載國
書答書誓詔事目冊表之類而終以冊封劉豫及豫
謝表書分兩卷上卷始天輔七年至靖康元年下卷
始靖康元年至天會七年此明長沙李文正公家藏
本卷中朱筆塗改自注據宋本皆公手筆也

卷首有西涯及

子孫永寶
二朱記

辛巳泣蘄錄一卷

舊鈔本

題從政郎蘄州司理權通判兼淮西制置司僉廳行
司公事趙與襄編紀嘉定十四年金兵陷蘄州郡守
李誠之死難事宋史與襄誤作與裕舊爲汲古閣藏

本卷首有汲古閣毛晉私印字子晉諸朱記

金國南遷錄一卷

舊鈔本

題金通直郎祕書省著作郎騎都尉張師顏撰自序
紀金南遷汴京事與金史多牴牾不合未有元浦元
玠跋

詔令奏議類

唐大詔令集一百三十卷

舊鈔本

宋朱敏求編并序中有闕字宋諱字減筆每半葉十五
五行行廿六字世無刊本此明人依宋刻鈔出闕第
十四至廿四第八十七至九十八凡三十三卷世亦

無全本可補矣。潛研錢氏謂此書敬宗寶曆元年南郊赦文有亞獻嘉王運賜物一百匹之語。知唐書十一宗諸子傳及德宗紀俱書嘉王運薨於貞元十七年之譌。唐人著述可援以訂正史籍者不少。古書所以足貴也。舊爲葉石君藏書。卷中有樸學齋陽城張氏省訓堂經籍記。張敦仁讀過太原王氏說。經堂收藏諸朱記。

西漢詔令十二卷 東漢詔令十一卷

宋刊本

西漢詔令宋林慮編有大觀三年程俱蔣璿序。又慮自序。東漢詔令樓昉續編有嘉定十五年自序。是編爲南宋時合刊。亦名兩漢詔令。卷首目錄前有洪咨

夔總論每半葉十行行十八字匡桓字減筆舊爲葉

九來沈椒園藏書

卷中有葉氏藏書南陽講習堂光
翰印玉峰徐氏藏書沈廷芳印椒

園誌
朱記

宋大詔令集一百九十五卷

舊鈔
本

不著撰人姓名據陳氏書錄趙氏讀書後志皆云紹興間宋宣獻家子孫所編纂玉海亦云出於宋綬之家案唐大詔令爲宣獻子敏求所編此書殆出敏求之後歟原書二百四十卷今闕宰相類卷七十一至九十三武臣類卷一百六至一百十五政事類卷一百六十七至一百七十七凡四十四卷雖已殘佚而

北宋典章所存實多其可據以參校宋史者不勝數也

注陸宣公奏議十五卷

元刊本

唐陸贄撰宋郎晁注案晁字晦之爲嵯縣主簿嘗注宣公奏議及三蘇文投進見周輝清波雜志此本前有紹興二年八月初七日進表而表中有至尊壽皇帝云云則紹興乃紹熙之譌也又有權德輿原序蘇軾進讀劄子卷一後有墨圖記云至正甲午仲夏翠巖精舍重刊

巖精舍重刊

卷首有敬父二字朱記

孝肅包公奏議集十卷

明刊本

宋包拯撰門人張田編田題辭謂公薨後三年田守廬州盡得公生平諫草於其嗣子大祝君因取其大者列三十門凡一百七十一篇紹興二十七年廬州學教授吳祇若刻板郡學旋燬淳熙二年合肥守東平趙礪老復跋而刻之明正統間合肥方正又有重刻本有胡儼序及正跋此則嘉靖間崇藩刻本卷中遇陛下聖慈等字每空格蓋輾轉相承猶不改舊本之式有舊序跋及嘉靖二十二年崇藩序

元城先生盡言集十三卷

明刊本

宋劉安世撰前有張九成序後有王絢梁安世跋淳

熙中有刻本陸慶辛未銅梁張壚山刻於大名郡學
陸東石星爲之序書中語涉宋帝俱空一格猶仍宋
本式也

李忠定公奏議六十九卷附錄九卷

明刊本

宋李綱撰陳俊卿及朱子二序俱稱八十卷此明正
德間巡按福建御史山陰胡文靜所刻非舊第矣有
文靜及林俊序

石林奏議十五卷

影鈔宋本

宋葉夢得撰舊不題名亦無序每卷次行題模編案
宋史本傳模公之子也建康集百卷已佚今傳八卷

本無奏議此本見陳氏書錄知宋時亦單行於世者其目案職守編次始應天尹終福建路安撫使皆過江後之作故趙氏輯諸臣奏議惟采上徽宗論朋黨之失一篇而未見此書宋史作傳歷敘其官與此所載略同且多采其辭是史臣亦見其書者惟傳中未及其爲應天尹乃其疏處郡中士禮居黃氏嘗得宋刊本此從之影寫者每半葉十行行二十五字

百宋一塵

賦注作每行十字脫去五字後有跋末署開禧丙寅六月既望姪

孫朝奉大夫改差權知台州軍州兼管內勸農事借紫箋謹書惜書中間有剝蝕跋尤蝕者過半不能讀

矣

宋特進左丞相許國公奏議四卷

鈔本

宋吳潛撰案公有履齋遺集四卷宣城梅氏所編已著錄 四庫全書提要此書傳本絕稀惟見淡生堂書目前有二序一爲里人一爲後裔皆不著姓名奏議凡六十三篇始紹定四年終景定三年宋史本傳所載諸疏悉在卷中

國朝諸臣奏議一百五十卷

宋刊本

題龍圖閣直學士朝散大夫成都潼川府夔州利州路安撫制置使兼知成都軍府事兼管內勸農使充

成都府路兵馬都鈐轄祥符縣開國伯食邑九百戶
臣趙汝愚編有進書劄子并序此書以北宋諸臣章
奏分類編輯始事於守閩郡時成書於知成都日凡
十二門曰君道帝系天道百官儒學禮樂賞刑財賦
兵制方域邊防總議進呈乙覽蜀中有刻本旋以兵
燬淳祐間忠定孫必愿出家藏彙本福建路提舉史
季溫重刻之卽是本也每半葉十一行行廿二字有
趙希滸及史季溫序

諸臣奏議一百五十卷

校宋本

此錫山華氏會通館本卽依宋本擺印惟原闕處卽

連接之爲謬友人邵艮仙據宋本一一校正跋其後
云會通館活字本中間譌謬舛踏幾不可讀甲申秋
七月假張月霄所藏宋板讐校缺者補之訛者正之
以甲之前半篇接乙之後半篇而不能句讀者足之
宋板漫漶者闕之凡雙行夾注者悉以紅點誌之歷
十月而始蕺事其趙希澗序一篇奏劄一道自敘一
篇史季温跋一篇總目十三葉活字本未錄目錄一百四
葉俱照宋板錄出以存其真

鐵琴銅劍樓藏書目錄卷九終